

Arausgem s puach "Sòtzlear 2" ver za learnen s bersntolerisch

S puach geat envir za derklörn de sòtzlear ver de lait as kennen schoa' eppes van bersntolerisch

Szboate puach as de sòtzlear van bersntolerisch ist kemmen gadruckt ont bart hëlven de lait ver za kennen pesser de grammatik ont ölls s sèll as bichte ist za bissn ver za arivarn as an livell B1-B2 va de doi sproch. S puach ist asou organisart: an iatn kapitel paschraipt eppes va de grammatik, va de variazion, va de kultur ont s hót naia bichtega beirter as men schellat bissn. S hót aa vil exercizi va de viar kompetenz ver za learnen a vremen sproch: lesn, hearn, klöffen ont schraim. Ver de exercizi van hearn hót s an CD-rom as men mu' hearn hoam oder en de schual pet en learer. Der CD-rom könn hëlven de lait as hom koa' zait za möchen der kurs va bersntolerisch ont belln learnen de sproch hoam. S puach paschraipt an etlena temen va de sòtzlear ont va de grammatik, abia zan paispil de modalverbn

ont de nemsòtzn. Derzua, de variazion van bersntolerisch ist paschrim: s ist tschrim bos me mu' song ont bos men mu' nèt song (paschrima grammatik), ober s ist nèt tschrim bos ist rächt ont bos ist pfalt (vourtschrima grammatik), vavai eppes as men mu' song ver an vlarotzer könn sai' komesch ver an oachläiter ont er bart song as an önder vurn, ober peada de virm sai' rächt. De diferenzn en de sproch sai' nèt lai zbischn de derver, de kennen sai' aa zbischn junga ont òlta lait, zbischn mander ont baiber, o.a.e. S ist bichte za probiarn za paschraim s klöffen van òlla. Dóra, en an iatn kapitel ist vertiaft an tema va de kultur ont va de gschicht van Bersntol, abia zan paispil de musik, der krönz, der Filzerhof, s bersntolerisch en de zait van internet. S doi puach ist a bichtega örbet ver za paschraim s bersntolerisch ont ver za



derklörn an etlena temen va de grammatik as sai' nou nèt asou vertiaft gaben ont men denkt as s ist a groas hilf ver za learnen s bersntolerisch. S puach "Sòtzlear 1" ist ver de u'vonger as belln learnen s bersntolerisch (A1-A2), s doi "Sòtzlear 2" ist ver de lait as bissn schoa' eppes (B1-B2). Velaicht verleist bart kemmen a "Sòtzlear 3"

ver de lait as sai' interessart za vertiaven nou mear de sai'negen kompetenzn va de doi sproch (C1-C2). De autoren van doi puach sai' de Federica Cognola, leareren va de taittscha sproch en de Universitet Ca' Foscari va Venezia, ont de Evelina Molinari, studenten va de Universitet va Trea't.

Evelina Molinari

È STATO PUBBLICATO "SÒTZLEAR 2", IL SECONDO VOLUME SULLA SINTASSI DEL MÖCHENO, CHE COPRE I LIVELLI DI COMPETENZA LINGUISTICA INTERMEDIA (B1-B2) DEL QUADRO EUROPEO DI RIFERIMENTO PER LA CONOSCENZA DELLE LINGUE

DE STELA EN DE ZAIT VAN COVID-19

Haier hót men singen kennt lai en de kirch



QUEST'ANNO ANCHE LA SECOLARE TRADIZIONE DELLA STELLA HA SUBITO LE LIMITAZIONI PER IL COVID-19


De Stela ist an gònz òltn prauch as kimm p òlbe envirtrong en Bersntol. S ist gaben an prauch va vil derver as de Alpn, ka balscha, taittscha ont ladinischa volker, ober iaz ist er lebet plim en nea'mer souvle derver. De lait va Palai ont va Vlarotz sai' stolz as en doi prauch ont de sai' v'roa òll jor za meing se trèffen za singen. S sai' lai de mander as singen ont de koskrittn gea' aa zòmm pet sei. Abia de drai kineng, de gea' haus ver haus za gem pakönt en òlla as s Kristkindl ist augöngen. S ist abia a tsungens gapett. S doi jor ist gaben a hórts jor ver òlla

ont men hót nèt gameicht möchen trèffen va mearer lait. Der prauch va de Stela ist aa, ver en earste vòrt no en zboate Bèltkriag, gahòltn kemmen, de stelari hom nèt gameicht gea' haus ver haus za singen. Der pföff, de singer ont de pirgermoastern hom ausgamòcht za singen lai no de mess, aus va de kirch. Der pföff hót gabichen de Stela ont dóra de stelari hom tsungen ver òlla de lait ont ver de òrmen sealn van dorf. Vèrr oa's van önder ont pet de schitzlòrf. Abia as ist der prauch, en Palai hót men asou tsungen en òltjor, en najjort ont en geimòcht, en Vlarotz, en Inderpèrg ont en Auserpèrg en najjort ont en de Geimòcht.

Evelina Molinari

SPIEL

Derrot abia as de hoasn de òrbetn as bersntolerisch ont schraib sa en der rächte plòtz. En de gela colonna de barst arausvinnen abia as er hoast ber as trogt de post en de haiser.



- Ber as òrbetet s vèlt
- Diarn as schaut no en de kinder
- Ber as hiatet de vicher
- Ber as mòcht schua
- Baib as schnait s hor
- Ber as mòcht tsunt kemmen de lait pet en kuriarn sa
- Ber as leart en a schual
- Ber as hòckt de pa'm en bòlt
- Ber as tuat fotografarn
- Ber as òrbetet pet en stoff
- Ber as geat umadam za verkaven söchen

